

**TEZAU LITURGIC**  
**11 NOIEMBRIE**

**ACATISTUL**  
**SF. MUCENIC**  
**VICTOR**  
**DE LA DAMASC**



**MOSCOVA, 2000**



# **Акафист**

## **СВЯТОМУ МУЧЕНИКУ**

### **Виктору Халкидонскому**

#### **Кондак 1**

---

Избраннаго воина Христа Бога нашего, святаго мученика Виктора песньми почтим, яко ходатая нашего и молитвенника; ты же, страстотерпче, яко имеяй дерзновение ко Господу, от всяких нас бед свободи, да зовем ти: Радуйся, Викторе, мучениче преславный.

#### **Икос 1**

---

Ангел земный и человек небесный явился еси, святыи мучениче, егда озарившеся светом истиннаго богопознания, радостно потекл еси на страдальческий подвиг. Темже, поминающе страдания твоя, за Христа претерпенныя, вопием ти сице:

Радуйся, Творца всяческих всем сердцем возлюбивый.

Радуйся, за имя Его тяжкая страдания приемый.

Радуйся, идољское нечестие обличивый.

Радуйся, любви ради твоя ко Христу живота своего не пощадивый.

Радуйся, славу мира сего ни во чтоже вменивший.

Радуйся, сладости райския вкусивый.

Радуйся, Викторе, мучениче преславный.

### **Кондак 2**

---

Видя гонения нечестивых на христианы, не убоялся еси прещения и мучительства их, но яко доблей воин Христов, пред нечестивым воеводою Севастианом предстал еси, и веру свою во единого истинного Бога исповедал еси, поя велегласно: Аллилуиа.

### **Икос 2**

---

Разум богодухновен имея, святыи мучениче Викторе, изумил еси мучителя мужеством души твоя и словеса, имиже дерзновенно проповедал еси Христа - Истинного Бога. Темже, похваляюще исповедание твое, вопием ти таковая:

Радуйся, единого истинного Бога проповедниче.

Радуйся, Пресвятая Троицы верный поклонниче.

Радуйся, идольскаго служения искоренителю.

Радуйся, христианскаго благочестия насадителю.

Радуйся, Царствия Небеснаго наследниче.

Радуйся, славы вечныя сопричастниче.

Радуйся, Викторе, мучениче преславный.

### **Кондак 3**

---

Силою Вышняго укреплен, дерзновенно пред мучителем стал еси, мужественный исповедниче Христов, темже угрозы и ласкательства онаго презрев, на подвиг мученический потекл еси, поя Богу: Аллилуиа.

### **Икос 3**

---

Имея крепкую надежду на Небеснаго Владыку и Господа, и помняще слово апостольское, яко подобает повиноватися Богу паче, нежели человеком, ты, святыи мучениче, не повинуюся велению мучителя, но исповедав себе воином Царя Небеснаго быти, отринул еси языческое нечестие и в руке мучителей предался

еси. Мы же, поминающе мужество твое, вопием ти сице:

Радуйся, доблий воине Царя Небеснаго.

Радуйся, верный рабе своего Домовладыки.

Радуйся, угрозы нечестивых презревый.

Радуйся, прелесть идольскую обличивый.

Радуйся, подвиг мученический добре совершивый.

Радуйся, веру свою во Христа кровию засвидетельствовавый.

Радуйся, Викторе, мучениче преславный.

#### **Кондак 4**

---

Бурею ярости одержим, безумный мучитель повеле тяжко мучити тя и в печь огненную вовреци. Ты же, все упование свое на Бога возложивый, во огонь, якоже иногда три отроцы, безбоязненно вшел еси, поя победную песнь: Аллилуиа.

#### **Икос 4**

---

Слышав нечестивый воевода, яко по триех днех пребывания во огненной печи, ты, славный мучениче, невредим обрелся еси, и еще

большия ярости исполняяся, призва чародея и повеле ему умертвити тя. Ты же, смертоносную пищу приим, паки неврежден пребыл еси, подвизая вопити тебе таковая:

Радуйся, поборниче веры непоколебимый.

Радуйся, страстотерпче, адаманта твердейший.

Радуйся, огня неубоявыйся.

Радуйся, росую молитв твоих пламень огненный угасивый.

Радуйся, смертоносныя снеди вкусив, невредим пребивый.

Радуйся, пищи райския ныне наслаждайся.

Радуйся, Викторе, мучениче преславный.

### **Кондак 5**

Боготечней звезде подобен был еси, мучениче Христов, указующей путь спасения: чародея бо, умертвити тя хотящаго, веровати во Христа подвигл еси, научая воспевати купно с тобою: Аллилуиа.

## Икос 5

---

Видевше душевными очима своима Бога, яже чудодействующа тобою, святой Викторе, волхв нечестивый умилися сердцем и уверова во Христа, тобою проповедуемаго. Мы же, воспевая величия Божия, на тебе явленная, глаголем:

Радуйся, спасительным словом тьму неверия разгнавый.

Радуйся, мученическим веры исповеданием неверных ко Христу обративый.

Радуйся, вся козни диавола разрушивый.

Радуйся, силу демонскую верою Христовою низложивый.

Радуйся, верных ко прославлению Бога воздвигающий.

Радуйся, в бедах и скорбех сущих прибегати к Нему наставляющий.

Радуйся, Викторе, мучениче преславный.

## Кондак 6

---

Проповедником истинныя веры во Христа явился еси пред мучители твоими, страстотерпче славне, никия бо раны тебе содеянныя не возмогоша повредить тебе:

кипящий бо елей, аки источник воды прохладныя тебе показася, и оцет, аки сладкий сот тебе бысть. Мы же, терпению твоему удивляся, вопием Богу, дивному во святых Своих: Аллилуиа.

## Икос 6

---

Возсия свет слепотствующим очесем мучителей твоих, егда ты, святой мучениче, имя Господа Иисуса призвал еси. Сего ради тебе, славному угоднику Божию и чудотворцу, взываем:

Радуйся, скорый наш пред Богом заступниче и ходатаю.

Радуйся, о душах наших теплый предстателю.

Радуйся, недужных молитвою своею исцеляяй.

Радуйся, раны душевныя и телесныя врачуяй.

Радуйся, веру нашу укрепляяй.

Радуйся, надежду нашу утверждаяй.

Радуйся, Викторе, мучениче преславный.

---

## Кондак 7

---

Хотяще прославити Бога, укрепляющаго избранныя Своя, жена некая, именем Стефанида, пришедши на место мучения твоего и велию терпению твоему удивляясь, виде венцы нетленные с небесе сходящия. Сие убо благоговейно зряще и Бога в сердце своем славяще, возопи: Аллилуиа.

## Икос 7

---

Новую показа безчеловечия ярость злобный мучитель, егда юную Стефаниду, похваляющую страдания твоя, мучениче Христов Виктор, повеле, приклонив ветви древес, привязавши, разреши. Мы же, подвиг святых мученицы славяще, ублажаем купно с нею страдания твоя, страсотерпче, вопиюще:

Радуйся, жертвою благоприятною, якоже Авелево приношение, Богу бывый.

Радуйся, праведности и благих дел, якоже Ной, исполненный.

Радуйся, в вере Аврааму подражаяй.

Радуйся, Иову в терпении последствуяй.

Радуйся, якоже Давид, все упование свое на Господа возложивый.

Радуйся, лик мученический восполнивый.

Радуйся, Викторе, мучениче преславный.

### **Кондак 8**

---

Странно бе видети и слышати языком, неведущим Божией силы, како в слабом человечестем телеси возможно таковыя претерпевати за Христа муки. Мы же, славяще Бога, даровавшего святым мучеником таковую крепость, с любовью взываем: Аллилуиа.

### **Икос 8**

---

Весь радости божественныя исполнился еси, святой мучениче, егда повеление мучителя на мечное твое усечение услышал еси. Мы же, страдания твоя воспоминающе, и велие терпение твое похваляюще, глаголем:

Радуйся, веру, надежду и любовь до конца сохранивый.

Радуйся, венец мученический от руки Вседержителя приемый.

Радуйся, в невечернем дни Царствия Христова водворивыйся.

Радуйся, во обителях райских на Небеси  
вселивыйся.

Радуйся, усердно у престола Божия о нас  
молящийся.

Радуйся, о призывающих тя непрестанно  
пекущийся.

Радуйся, Викторе, мучениче преславный.

### **Кондак 9**

---

Всякия беды и напасти избави нас  
молитвами твоими, страстотерпче святыи  
Викторе, велие бо имаши дерзновение пред  
Господем, за Негоже и душу свою положил еси,  
взывая непрестанно: Аллилуиа.

### **Икос 9**

---

Витии многовещаннии не возмогут изрещи  
тебе достойныя хвалы мучениче славный,  
многих ради подвигов и страданий, ихже за  
Христа подъял еси волею. Сего ради мы,  
недоумевая восхвалити тя по достоянию,  
воспеваем сие:

Радуйся, веры христианския исповедниче  
неустрашимый.

Радуйся, воине Христов непобедимый.

Радуйся, благонадежный помощниче всем за истину терпящим.

Радуйся, скорый утешителю в беде сущих.

Радуйся, Церкви Христовы защитниче.

Радуйся, всех православных заступниче.

Радуйся, Викторе, мучениче преславный.

### **Кондак 10**

---

Спасения и вечныя радости достигше по мнозех страданиях Христа ради, ты, святой мучениче, научаеши и нас вся, ради Бога, благодушно претерпевати и на Него единого все упование свое возлагати, воспевая песнь: Аллилуиа.

### **Икос 10**

---

Стена и прибежище к тебе притекающим ты еси, угодниче Божий, молишися бо непрестанно Христу Богу нашему за всех почитающих страдания твоя. Приими убо, мучениче многострадальне, и от нас грешных сия убогия похвалы:

Радуйся, яко возлюбил еси живот вечный паче временнаго.

Радуйся, яко Царствие Небесное предпочел еси славе человечестей.

Радуйся, яко страдания твоими снискал еси нескончаемую радость.

Радуйся, яко вкусивши смерть мученическую, прешел еси к блаженному безсмертию.

Радуйся, горняго Сиона наследниче.

Радуйся, Христовы Церкви велие удобрение.

Радуйся, Викторе, мучениче преславный.

### **Кондак 11**

---

Пение Пресвятей Троице воздал еси, святыи мучениче Викторе, не словом точию, но живым всего себе в жертву принесением: Творца бо своего паче всего возлюбил еси и Ему единому добре послужил еси, поя со умилением: Аллилуиа.

### **Икос 11**

---

Светоприемный светильник истиннаго света сущим на земли являешия, богоизбранне Викторе, просвещаеши бо сердца верных и к разуму Божественному наставляеши вопиющих ти с любовию таковая:

Радуйся, Подвигоположника Христа последователю.

Радуйся, жития непорочнаго рачителю.

Радуйся, кротости и смирения образе.

Радуйся, послушания и терпения учителю.

Радуйся, светило благочестия немерцающее.

Радуйся, звездо, ко спасению путь верный показующая.

Радуйся, Викторе, мучениче преславный.

### **Кондак 12**

---

Благодать Божественную испроси нам, мучениче Христов, много бо может молитва праведнаго ко благосердию Владыки, не возгнушайся наша греховныя нечистоты, но буди нам во всем помощник и к покаянию благий наставник, научая милующему нас Богу воспевати: Аллилуиа.

### **Икос 12**

---

Поюще многострадальныя подвиги твоя, славный страсотерпче, хвалим долготерпение твое, ублажаем мученическую кончину, почитаем священную память твою и в похвалу сицевая тебе зовем:

Радуйся, во страдании своем доблесть чудную явивый.

Радуйся, язвы Господа Иисуса Христа на теле твоём носивый.

Радуйся, наследие Царствия Христова стяжавый.

Радуйся, в дому Отца Небеснаго обитель себе сотворивый.

Радуйся, яко тобою Бог прославляется.

Радуйся, яко тобою демоны посрамляются.

Радуйся, Викторе, мучениче преславный.

### **Кондак 13**

---

О всеблаженный святыи мучениче Викторе, приими сие наше хвалебное пение, от умиленнаго сердца тебе приносимое, и избави нас от всякаго зла твоим теплым к Богу ходатайством, да с тобою и всеми святыми воспоем победную песнь: Аллилуиа.

(Этот кондак читается трижды, затем икос 1 и кондак 1)

---

## Молитва

О святыи угодниче Божий, славный мучениче Викторе! Подвигом добрым подвизався на земли, восприял еси на небесех венец правды, егоже уготовал естъ Господь всем любящим Его. Темже взирающе на святыи твой образ, радуемся о преславнем скончании жительства твоего и чтим святуу память твою. Ты же, предстоя престолу Божию, приими моления наша и ко Всемилостивому Богу принеси, о еже простити нам всякое прегрешение и помощи нам стати противу кознем диавольским, да избавльшеся от скорбей, болезней, бед, напастей, и всякаго зла, благочестно и праведно проживем в нынешнем веце и сподобимся предстательством твоим, аще и недостойни есмы, видети благая на земли живых, славяще единаго во святых Своих славимаго Бога, Отца и Сына и Святаго Духа, ныне и во веки веков. Аминь.



**ПОЛНЫЙ  
АКАФИСТНИК  
КАНОНИЧЕСКИЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

†

НОВОЕ  
\* НЕБО